

羅浮志卷十三原卷

東莞陳璉廷器撰

九龍眞逸補

詩上神仙 六朝至五代

羅浮舊有題詠騰芳振響林壑增輝歷年既久散逸尤甚  
後來收錄者雖云富矣然精粗相雜工拙莫分子因掇其  
英華芟其鄙俚首紀神仙之詩次錄唐宋以後諸作若夫  
播大雅之音騰金玉之奏者尙有俟當代名公鉅卿與賢  
才逸士云原

眞逸按此文稱錄宋以後諸作而原編乃祇神仙及唐  
八詩蓋已佚也然山志會編及近人陸心源宋詩紀事  
補遺引羅浮志所載宋人詩甚備疑并見是書足本茲

羅十三

一

采錄之并搜考他書以補所闕佚又原編首紀神仙詩  
文則否茲亦仍之其元代及洪武間諸詩山志會編所  
有者亦當出是編并錄補焉

神仙詩

羅浮神仙留題者舊相傳此詩題在上界三峯  
兒 者得之錄以記誦至今石上詩

千徑嵐光溼不開洞中樓閣鎖瓊瑰羅山萬仞雲中起浮  
島一峯天外來五岳神仙多往復九霄鸞鶴自徘徊葛眞  
舊隱丹爐畔掩映麻姑錦繡臺原

八仙詩古今相傳有八仙共飲於藥槽下流杯池上

溜流青嶂瀉溪灣漱石穿雲湍復旋琥珀杯深誰共飲八

仙齊會賀堯年原

黃龍洞無名仙詩三首

雲外觀山出怪奇雲間縹緲立多時  
壑舟有力如何負泉錫無源底處移  
千古流傳成勝跡幾人修煉得真機  
遲留爲愛黃龍洞松下閒尋一局棋

白鶴歸來歲月長人間名利久相忘  
心傳六洞丹霞訣口詠三光紫府章  
雲裏泉流芝草潤山頭月近桂枝香  
清遊恰欠麻姑在好約同來醉玉漿

黃龍洞內石佛起中是神仙地虛巖遠透武陵源  
變作七星泉原

滇陽鄭玠續葛仙詩有序

羅十三

二

唐時有人避地入觀源洞見石室壁間刻稚川詩  
云松門石徑茸芳草落花滿院香沉沉及再觀不  
見其處恨不記其全篇玠爲足成全篇云

麻姑峯頭黃鶴歸稚川竈上丹霞棲寒猿嘯木山月白正  
是仙人朝斗時壺天景象何靈杳松門石徑茸芳草落花  
滿院香沉沉緣似劉郎應解到碧溪數聲連暮鐘夢回已

覺松窗曉

原按博羅志唐大曆中盧邱曹避地入山居觀源洞一日入見一石室中四壁悉鑄仙家歌詠

并仙方盧暗記其詩乃葛仙詩云松門石徑茸芳草落花  
滿地香沈沈又有菖蒲方云五月七月九月之時采之酒  
煮蜜丸甘草爲使可以長生  
不死後滇陽鄭玠足成全篇

寄羅浮道士

呂洞賓

羅浮道士誰同流  
草衣木食輕王侯  
世間甲子管不得  
壺

裹乾坤只自由數著殘棋江月曉一聲長嘯海山秋飲餘  
回首話歸路笑指白雲天際頭原

憶羅浮

古成之

相思天一邊知在石樓間高卧人稀到數峯雲共閒仙方  
新更試易疏舊曾刪好探鼈頭信時應有鶴還原按粵詩  
蒐逸題作

憶石樓易疏句下注云成之遷居增  
城結廬羅浮讀書著有刪易注疏

又

古成之

憶著羅浮最上峯當年曾得寄凡蹤凭闌月色出滄海欹  
枕秋聲入古松採藥靜尋幽澗洗寄書閒背白雲封紅塵  
一下拘名利不聽山間午夜鐘原

宿冲虛觀

胡衍

羅十三

三

鐘靜日已夕塵緣謝驅後琪枝鶴爭定山空萬籟寂明月  
散庭除寒光照牀席花鳥魂夢閒相見曾相識五更仙鹿  
鳴聲近在籬隙曉來問童子石徑無行跡據博羅志補

鐵橘

胡衍

是鐵不是鐵非空却似空到得方知得何勞說異同據博羅志補

朝斗壇

胡衍

不見銅龍何處飛空餘芳草舊臺基月明風冷禽聲碎疑  
是真人佩王時據山志會編補

贈冲虛觀道士

白玉蟾

吾師有道貌山水箇中人無著故無累是清還是真煙霞

供笑詠泉石瀹精神何日分峯隱誅茅願卜鄰

原

次水簾洞韻

白玉蟾

天上眞珠直下垂更無鈎箔惹塵埃青鸞白鶴從教入紫  
詔黃封不用來夜月祇爲蘇鄜照晚風端與葛黃開縱饒  
展掛長千尺莫掩羅浮紫翠堆

原

羅浮

白玉蟾

鐵作橋梁雲作蓋石爲樓閣水爲簾歸來猿鶴相傳語記  
取前回白玉蟾

原

飛雲頂

此詩在冲虛蓬萊閣此詩是丹訣傳與鄒師正不能自悟惜哉眞素稽首

白玉蟾

飛雲頂上閣闌干夜半南溟出玉盤捲起水簾三百尺松

羅十三

四

風吹度鐵橋寒

原

青華吟

白玉蟾

羅浮山中春晝長風吹蘭花滿面香博山香斷一欵枕飛  
神直到玉帝旁火鈴將軍同直舍忽覺羽衣驚羽駕三千  
神女笑回眸整裾端簡龍墀下奏言臣昔因饗酒醉墮紅  
塵如此久袖藏一卷五雷書進前再拜重稽首今朝天開  
九龍關乃將見帝玉鍊顏令臣奏畢速回首下界一去思  
帝難此時侍仙小黃繖手執金書貼玉版精神縹緲素光  
中不覺瓊文照心眼於中最妙何所言青霞命下龍臺昏  
脚撥南辰開地脈掌翻北斗透天門香煙未滅烏雲走  
驅火豬逐鐵狗紫童飛出碧霄中劍光只見雷聲吼夢回

無人可與言一嘯天地陰晴分<sub>原</sub>

桃源洞

白玉蟾

因訪臞仙傍柳隈不堪風景把人催松杉十丈入斤斧厦屋數間俱劫灰道士潛心隱丹竈兒童勸我舉霞杯誰知自有長生訣獨步白雲歸去來<sub>原</sub>

明發石壁菴

白玉蟾

有客東北來翻然袖長蛇掀髯石壁前人間日已斜前望羅浮山千峯如排衙魚龍吹海水灑雨行天涯何處安期生種棗大如瓜見說蒲澗中尙有九節芽後來葛稚川亦得飯胡麻自汲水簾洞笑嚙黃金砂海山冥古今縹緲煙月賒急呼南海神采采扶桑花我欲騎天風去歸五雲家

羅十三

五

整衣謁紫皇及此鬢未華嗟彼紅塵人還如兔在罝胡不學飛仙白日昇九霞

飛仙吟送張道士

白玉蟾

夜騎玉鼇採明月蕊殿瑤臺寒徹骨三十六天不閉門風吹琪花散飛雪簫韶鳴處隊仗多八萬霓裳歌一闋紫皇宴罷駕方出整衣端簡去朝謁火鈴將軍呵一聲左右萬真聳毛髮奏云臣是雷霆卿舊因罪去辭金闕紅塵埋身平至耳餐青飲綠守苦節飛神登天來上謁見帝有酒覓一啜賜臣一醉放臣歸歸去人間向人說鳳皇閣下問歸途瓊童玉女却問余天宮長是太清虛人間還似此間無搖頭不答徑拂袖白雪渺渺迷清都洞中猿鶴更相認白

石爛兮青松枯

試劍石

白玉蟾

神劍沉埋生紫氛年來劍俠亦無聞一從袖裏青蛇去君  
山洞庭空水雲道人習劍得真訣時見壇前青石裂誰能  
持此靖八荒割然磔灑狐鼠血

白雲菴

白玉蟾

宿霧戀喬木落花粘瘦枝鳥聲人靜處山色雨來時霽月  
成相約涼風解見知僧房安一枕海氣濯水肌

張道士鹿堂

白玉蟾

清夢繞羅浮羽衣延我遊新茶尋雀舌獨芋煮鴟頭春鶴  
飲藥院夜猿啼石樓丹爐猶煖在聊爲稚川留

羅十三

六

泊頭圓照堂

白玉蟾

脫白來求法披緇去出家此心如水月結屋老煙霞翠長  
眞如竹黃開般若花寄言劉鐵磨自識趙州茶

雲母溪

白玉蟾

閩苑無踪跡唐朝有姓名不知紅玉洞千古夜猿聲

寄三山彭鶴林

白玉蟾

瞻彼鶴林在彼無諸鼓山之下螺江之隅瞻彼鶴林在彼  
長樂嵩山之下螺江之角一別鶴林春聿雲杪青山之外  
落花啼鳥一望鶴林回首千里斜陽之外白雲流水日復  
一日思我鶴林雁斷魚沉實傷我心

憶留紫元古意二首

白玉蟾

東風若有情吹我夢魂飛燈前半夜醒枕上三山歸二子  
相與言相執不相違何處一聲鐘寒淚滴征衣  
爲山莫太高太高常苦寒恩愛莫太深太深別離難黃鶴  
今何之白雲不復還暗想紫仙堂月照雙飛鸞

卽事寄紫元

白玉蟾

老雨餞秋菊孤煙醞暮嵐雁驚十月北梅早一枝南往事  
風吹帽良宵月挂簪時哉亦難得我已到無參

以上據粵東詩海補

沖虛觀

彭耜

天風吹衣霞飄飄叱馭從南來羅浮何謂玉笥搗藥鳥亦  
於石樓喧夜愁仙翁定知野人到道觀聊爲朝眞留一粒  
刀圭吾不與大椿那有八千秋

據博羅志補

羅十三

七

入羅浮

莫洞觀

嵯峩千仞控炎陬鐵作橋梁石作樓五嶺衆山皆拱附三  
神一島自漂流氣凌滄海近相視看入青雲勢未休借問

稚川今在否待飛雙燕結眞遊

據博羅志補

羅浮無名仙人詩

雲遊道人孫眞常傳云慶元淮西  
基地作天符觀石刻詩於其末題

云山人  
此得道

羅浮先生居道流飲泉漱石輕王侯壺中日月長來往物  
外乾坤自在遊劍氣衝開山月曉琴心寫破洞雲秋相逢  
苦恨無多日袖拂紅塵歸去休

原

羅浮歌朝斗回作

無名氏

紫霄飛步謁瓊樓回首人間只一周雲繞崑崙山上起月

沉娑羯水中浮香煙欲斷歸來早羽駕相迎未敢留盡洗  
塵緣知熟路瑤池花木未應秋

原按山志會編題作  
七星壇云張湛然詩

### 羅浮奏章回

無名氏

玉殿朝元夜已深三千世界靜沉沉微微花雨露琪樹浩  
浩天風動寶林煙鎖崑崙山頂上月明娑羯海中心步虛  
聲斷一回首十二樓臺何處尋

原

### 題丹竈

無名仙

仙翁元不死遺跡儼然存伏虎看丹竈靈虬護洞門人間  
惡風日物外好乾坤便欲辭塵網來茲養道根

據粵東  
詩海補

### 贈鄒金壇歸羅浮

曹仙姑隱於  
都城

羅浮道士真仙子躍出樊籠求不死冰壺皎潔水鑑清洞

### 羅十三

八

然表裏無塵滓叱咤雷霆發指端馘邪役鬼篆飛丹朝吞  
霞氣松窗暖夜禮星辰玉簡寒琴心和雅胎仙舞屏絕淫  
哇追太古幽韻蕭森海島風餘音繚繞江天雨真居僻在  
海南邊溪上籠葱洞裏天靈鳳九苞飛檻外珍禽五色舞  
花前金絲裊露紫河車青霓跨嶺鐵橋斜羅浮自古神仙  
宅萬里來尋況是家我昔閨中方幼稚當年曾覽羅浮記  
形質雖拘一室間精魂已出千山外如今親見羅浮人疑  
是朱明降上真劍氣袖攜三尺水霞漿杖掛一壺春松姿  
鶴步何蕭散風調飄飄驚俗眼彈琴論道極精微追隨永  
日忘疏懶吾師出處任高情止則止兮行則行富有溪山  
寧顧利貴懷道義不干名我今寄跡都城裏門外喧喧弗



入耳上牀布被日高眠不爲公來不能起問公去速來何  
遲得接高談幾許時白雲偶向帝鄉過去住無蹤安可期  
我亦韶華斷羈縻何異翻蓬與飄葉相逢邂逅卽開顏禮  
樂何嘗爲吾設志同笙磬合宮商道乖肝膽成胡越相近  
未必常往還相遙未必長離別翩然孤鶴又南征寄語石  
樓好風月原按宋詩紀事有曹仙姑題梅壇詩事實未詳  
山志云宣和中徽宗廣求學仙之徒與工詩賦奇女曹仙  
姑與吳妙明皆徵至京師仙姑明於丹術作大道歌深得  
要旨道流競傳誦之勅封文逸真人與此注云隱於都城  
合其贈鄒師正詩蓋在都城作也此志女仙傳中無曹仙  
姑當以其未至羅浮茲  
不復補入附記於此

沖虛觀

單縣君

雄峯峻峙煥朱明元聖清虛此耀眞地靜無心閒日月山

羅十三

九

高舉首近星辰金壇露冷青鸞舞丹竈風清白鶴馴時有

仙人綠雲上九霄飄忽響韶鈞據仙志會編補

六朝詩

遊羅浮山

宋王叔之

菴靄靈嶽開景神封綿界盤趾中天舉峯孤棲側挺層岫

廻重風雲秀體草木媚容藝文類聚補○按山志會編載  
有王叔之鳳皇谷詩江淹羅浮

詩庾肩吾羅浮五色芝詩考白帖王叔之詩題作擬古不  
云鳳皇谷又初學記江淹詩題作白雲讚白帖庾肩吾詩  
題作芝草皆不  
云羅浮茲不錄

賦得神仙

陳陰鏗

羅浮銀是殿瀛洲玉作堂朝遊雲暫起夕餌菊恆香聊持  
履成燕戲以石爲羊洪崖與松子乘羽就周王初學記補  
○按圖書

集成引羅浮山志有此詩題作羅浮山○又按陳徐陵奉和山池詩羅浮無定所鬱島屢遷移不覺因風雨何時入後池此用羅浮二山風雨離合事者

唐詩

禪房懷友人岑倫

原注時南遊羅浮兼泛桂海自春徂秋不返僕旅江外書情寄之

李白

嬋娟羅浮月搖豔桂水雲美人竟獨往而我安得羣一朝  
語笑隔萬里懽情分沉吟綵霞沒夢寐羣芳歇歸鴻渡三  
湘遊子在百粵邊塵染衣劍白日彫華髮春風變楚關秋  
聲落吳山草木結悲緒風沙淒苦顏竭來已永久頽思如  
循環飄飄限江裔想像空留滯離憂每醉心別淚徒盈袂  
坐愁青天末出望黃雲蔽目極何悠悠梅花南嶺頭空長

羅十三

十

滅征鳥水闊無還舟寶劍終難託金囊非易求歸來儻有  
問桂樹山之幽原

江西送友人之羅浮

李白

桂水分五嶺衡山朝九疑鄉關渺安西流浪將何之素色  
愁明湖秋渚晦寒姿疇昔紫芳意已過黃髮期君王縱疎  
散雲壑借巢夷爾去之羅浮我還憩峨眉中澗道萬里霞  
月遙相思如尋楚狂子瓊樹有芳枝原按二詩俱見太白集

留別賈舍人至二首錄一

李白

天梁白雲起飄飄來南洲  
襄回蒼梧野十見羅浮秋  
鼇抃山海傾四溟揚洪流  
意欲託孤鳳從之摩天遊  
鳳苦道路難翱翔還崑邱  
不肯銜我去哀鳴慙不周  
遠客謝主人明

珠難暗■拂拭倚天劍西登岳陽樓長嘯萬里風掃清霄  
中憂誰念劉越石化爲繞指柔

同王昌齡送族弟襄歸桂陽二首錄一 李白

秦地見碧草楚謠對清樽把酒爾何思鷓鴣啼南園余欲  
羅浮隱猶懷明主恩躊躇紫宮戀孤負滄洲言終然無心  
雲海上同飛翻相期乃不■芳根

金陵江上遇蓬池■  
於落星石上  
裘換酒爲飲

李白

心愛名山遊身隨名山遠羅浮麻姑臺此去或未返遇君  
蓬池隱就我石上飯空言不成歡強笑惜日晚綠水向雁

■雲蔽龍山歎息兩客鳥裘回吳越間共語一執手留

羅十三 十一

連夜將久解我紫綺裘且換金陵酒酒來笑復歌興酣樂  
事多水影弄月色清光奈愁何明晨挂帆席離恨滿滄波

以上太白集補○按集中當塗趙炎少府粉圖山水歌峩  
眉高出西極天羅浮直與南溟連又安陸白兆山桃花岳  
寄劉侍御縮詩時昇翠微上邈  
若羅浮巔白詩蓋屢稱羅浮

詠懷 杜甫

邦危壞法則聖遠益愁慕飄飄桂水遊悵望蒼梧暮潛魚  
不銜鉤走鹿無反顧噉噉幽曠心拳拳異平素衣食相拘  
閔朋知限流寓風濤上春沙千里侵江樹逆行少吉日時  
節空復度井竈任塵埃舟航煩數具牽纏加老病瑣細□  
俗務萬古一死生胡爲足名數多憂污桃源拙計泥銅柱  
未辭炎瘴毒擺落跋涉懼虎狼窺中原焉得所歷住葛洪

及許靖避世常此路賢愚誠等差自愛各馳驚羸瘠且如  
何魄奪鍼灸屢擁滯僮僕慵稽留篙師怒終當挂帆席天  
意難告訴南爲祝融客勉強親杖屨結託老人星羅浮展  
衰步原按集有  
此錄其後一首

洗心

司馬退之

不踐名利道始覺塵土腥不味稻粱食始覺精神清羅浮  
奔走外日月無短明山瘦松亦勁鶴老飛更輕逍遙此中  
客翠髮皆長生草木多古色犬無新聲君有出俗志不  
貪英雄名傲然脫冠帶改換人間情去矣丹霄路向曉雲

冥冥

據全  
詩補 □

寒栖子歌

原注曾居廬山欲  
有事羅浮之行

僧皎然

羅十三

十二

君在廬山知不羣有疑是鶴又是雲生死塵埃汗不得眼  
前榮利徒紛紛今日惠然來訪我酒榼書囊肩背荷拂除  
衣上餌煙霞昨夜胥門宿蔡家天然不飲亦不食拋名換  
姓覓不得且向人間作酒僊不肯將身生羽翼停形爲餌  
天地根原注胎  
息道成 世人皆死獨存洗慮因吞清明錄世人  
皆貪我常足栖子妙今道成手把玄樞心運冥能令鬼  
哭神效靈身如飄風不可朝遊崆峒夕汗漫向來坐客  
猶未散忽憶羅浮去時遙指孤雲作路歧海上仙遊不  
可見人間日落空桑枝杼山  
集補

有僧言羅浮事因爲詩以寫之

劉禹錫

君言羅浮上容易見九漸高元氣壯洶湧來翼身夜宿

最高峰瞻望浩無鄰海黑天宇曠星辰來逼人  
是時當朏魄陰物恣騰振日光吐鯨背劍影開  
龍鱗倏若萬馬馳旌旗聳齋淪又如廣樂奏  
金石含悲辛疑其有巨靈怪物盡來賓陰陽  
迭用事乃俾夜作晨咿喔天雞鳴扶桑色昕  
昕赤波千萬里湧出黃金輪下視生物息  
罪如隙中塵醯雞仰甕口亦謂雲漢津  
世人信耳目方寸度大鈞安知視聽外  
怪愕不可陳悠悠想大方此乃栢水濱  
知小天地大安能識其真

據全唐詩補○按琴軒此志祇錄陰陽至黃金輪六句蓋未見原詩

羅浮山人與葛篇

李賀

依依宜織江雨空雨中六月蘭臺風博羅老仙時出洞  
千歲石牀啼鬼工蛇毒濃凝洞堂溼江魚不食銜沙立欲翦

羅十三

十三

湘中一尺天吳娥莫道吳刀澀

原按詩見長吉集

送鄭丞之羅浮中習業

楊衡

百年泛飄忽萬事繫衰榮高鴻脫矰繳達士去簪纓始從  
天目遊復作羅浮行雲卧石林密月窺花洞明全形在氣  
和習默憑境清夙祕絳囊訣屢投金簡名鐘管促離觴煙  
霞隨去程何當眞府內重得款平生

贈羅浮易鍊師

楊衡

海上多仙嶠靈人信長生榮衛冰雪姿嚙嚼日月精默書  
絳符遍晦步斗文成翠髮披肩長金蓋凌風輕曉籟息塵  
響天雞叱幽聲碧樹夾戶陰丹霞照窗明焚香叩虛寂稽  
首迴太清鸞鷲振羽儀飛翻拂旒旌左挹玉泉液右搴雲

芝英念得參龍駕攀天度赤城

以上唐詩補全

題羅浮石

原注刻於石上

李德裕

清景持芳菊涼天倚茂松

■山何必去此地有羣峰

重憶山居羅浮山

原注番禺所遺

李德裕

龍伯釣鼇時蓬萊一峰坼

原注裴淵廣州記羅浮山是蓬萊邊山浮來

飛來碧

海畔遂與三山隔其下多長溪

原注茅君內傳山下有七十二長溪

潺湲淙

亂石知君分如此贈逾荆山璧

以上會昌一品集補

羅浮山

張又新

江北重巒積翠濃綺霞遙映碧芙蓉不知未後滄溟上減却瀛洲第幾峰

贈別王鍊師往羅浮

施肩吾

羅十三

十四

道俗駢闐留不住羅浮山上有心期却愁仙處人難到別

後音書寄與誰

以上唐詩補全

將遊羅浮登廣陵楞伽臺別羽客

李羣玉

清遠登高臺晃朗縱覽歷濯泉喚仙風於此盪靈魄冷光邀遠日百里見海色送雲歸蓬壺望鶴滅秋碧波瀾收日氣天自回澄寂百越落掌中十洲點空白身居飛鳥上口詠玄元籍■如出塵籠想望吹簫客冥冥人間世歌笑不足惜竭來羅浮巔披雲煉瓊液謝公雲岑興可以躡高跡吾將抱瑤琴絕境縱所適

原

廣州重別方處士之封川

原注久約同遊羅浮期素秋而行

李羣玉

楚國傲名客九州徧芳聲白衣謝簪紱雲卧重巖扃長波  
飛素舸五月下南溟大笑相逢日天邊作酒星七年一雲  
雨常恨輝容隔天末又分襟離憂鬢堪白願回凌潮楫且  
著登山屐共期羅浮秋與子醉海色

送隱者歸羅浮

李羣玉

春山杳杳日遲遲路入雲峰白犬隨兩卷素書留貰酒一  
柯樵斧坐看棋蓬萊道士飛霞履清遠仙人寄好詩自此  
塵寰音信斷山川風月永相思

以上李羣玉集補

寄題羅浮別業

高駢

不將眞性染埃塵爲有煙霞伴此身帶日長江好歸信博

羅山下碧桃春

據全唐詩補

羅十三

十五

寄題羅浮軒轅先生所居

皮日休

亂峯四百三十二欲問徵君何處尋紅翠

原注山鳥名

數聲瑤

室響

原注山有璇房瑤室七十有二

眞檀一炷石樓深山都遣負沽來酒

樵客容看化後金從此謁師知不遠求官先有葛洪心

原

奉和襲寄題羅浮軒轅先生所居 陸龜蒙

鼎成仙馭入崆峒百世猶傳至道風暫應青詞爲穴鳳却  
思丹微伴冥鴻金公的的生爐際瓊刃時時到夢中預恐  
浮山歸有日載將雲室十洲東

甫里集補

送羽人王錫歸羅浮

曹唐

風前整頓紫荷巾常向羅浮保養神石磴倚天行帶月鐵  
橋通海入無塵龍蛇出洞閒邀雨犀象眠花不避人最愛

葛洪尋藥處露苗煙蕊滿山春據全唐詩補人按郴州志  
部運至長沙遇異人授以藥術郡大疫入山採藥全活甚  
眾後返長沙咸通十一年八月朔甘露降於居側竹木上  
錫啖之遂僊去今長沙有僊露臺考曹唐  
亦咸通間人所稱羽人王錫當卽一人

寄羅浮山道者二首

黃滔

天際雙山壓海濱天漫絕頂海漫根時聞雷雨驚樵客長  
有龍蛇護洞門泉石暮含朱槿晝煙霞冬閉木綿溫林間  
學道如容我今便辭他寵辱喧

有人曾見洞中仙纔到人間便越年金鼎藥成龍入海玉  
函書發鶴歸天樓開石脉千尋直山拆鼈鱗一半臙誰到  
月明朝禮處翠巖深鎖荔枝煙黃御史集補

羅浮山下書逸人壁

曹松

羅十三

十六

海上亭臺山下煙買時幽邃不爭錢莫言白日催華髮自  
有丹砂駐少年漁釣未歸深竹壺猶戀落花邊可中  
更踐無人境知是羅浮第幾天

賦得送軒轅先生歸羅浮山

李洞

舊山歸隱浪搖青綠鬢山童一帙經符帖布帆猿鳥看藥  
煎金鼎鬼神聽洞深頭上聆仙語船靜鼻中聞海腥此處  
先生應不住吾君南望漫勞形

懷仙吟二首錄一

陳陶

丹陵五牙客昨日羅浮歸赤斧尋不得煙霞空滿衣試於  
華陽問果遇三茅知採藥向十洲同行牧羊兒十洲隔八  
海浩渺不可期空留隻白鶴巢在長松枝以上據全詩補



羅浮

僧小白

危閣閒登思渺漫九天如在掌中看遊人莫著單衣去六月飛雲帶雪寒原

中閣

僧小白

棱層高閣倚巖扃俯瞰塵寰仰摘星晝夜泉聲混天樂遊人好向靜中聽原

送芝上人遊羅浮二首

岳麓僧清範

一瓶一錫十方遊揮塵湘南夜語投四百好峯在何許寄師雙眼看羅浮

此身政坐愛名山投老求閒可得閒遙夜相思千里月想

應騎虎度松關原

按小白清範時代未詳四詩全唐詩亦未載

羅十三

十七

贈軒轅先生

僧貫休

曾親文景上金鑾語共容成語一般久向紅霞居不出若非清世見應難滿鑪藥熟分仙盡幾局碁終看海乾略問

先生真甲子只言弟子是劉安

寶月集補○按全唐詩貫休字德隱俗姓姜氏蘭溪

人天復中入益州王建禮遇之終於蜀考集中有題曹溪祖師堂詩有南海晚望詩貫休蓋曾遊粵東詳贈軒轅詩意似集歸舊山後貫休訪之羅浮作

懷軒轅先生

僧齊己

不得先生信空懷汗漫秋月華離鶴背日影上鼇頭欲學孤雲去其如重骨留槎程在何處人世屢荒邱白蓮集補○按全唐

詩齊己名得生姓胡氏潭之益陽人棲衡嶽東林後經江陵高從誨留為僧正居之龍興寺

聽軒轅先生琴

僧虛中

訣妙與矻精通宵膝上橫一堂風冷淡千古意分明坐客  
神魂凝巢禽耳目傾酷哉商紂世曾不遇先生據全唐詩  
唐詩虛中宜春人客於馬氏住湘西粟城寺考齊己虛中  
詩二人足跡似未至粵東疑軒轅集被召往返道經湘中  
故與相善

五代詩

羅浮山

文丙

羅浮多勝境夢到固無因知有長生藥誰爲不死人根雖  
盤地脉勢自倚天津未便甘休去須棲老此身據全唐詩補